

連及困及至漢使非出幣物不得食不市畜不得騎所

以然者以遠漢而漢多財物師古曰遠音于萬反故必市乃得所

欲及呼韓邪單于朝漢後咸尊漢矣

桃槐國王去長安萬一千八十里師古曰槐音回戶七百口五

千勝兵千人

休循國王治烏飛谷在葱領西去長安萬二百一十里

戶三百五十八口千三十勝兵四百八十人東至都護

治所三千一百二十一里至捐毒衍敦谷二百六十里

西北至大宛國九百二十里西至大月氏千六百一十

里民俗衣服類烏孫因畜隨水草本故塞種也